

15. november 2008

UKA2008/73

**Inissianik attartortitsisarneq pillugu Inatsisartut peqqussutaata
allanngortinneqarnissaa pillugu Inatsisartut peqqussutissaattut siunnersuut
pillugu**

ISUMALIUTISSIISUT

**Inatsisartut Attaveqaqatigiinnermut Ineqarnermullu Ataatsimiititaliaannit
saqqummiunneqartoq**

siunnersuutip aappassaaneerpeqarnerani saqqummiunneqartoq

Inatsisartut Attaveqaqatigiinnermut Ineqarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Godmand Rasmussen, Atassut, siulittaasoq
Inatsisartunut ilaasortaq Jonathan Motzfeldt Siumut, siulittaasup tullia
Inatsisartunut ilaasortaq Per Rosing Petersen, Siumut
Inatsisartunut ilaasortaq Esmar Bergstrøm, Inuit Ataqtigiit
Inatsisartunut ilaasortaq Olga P. Berthelsen, Inuit Ataqtigiit

0. Siunnersuutip imarisaa

Atassut UPA08-imi aalajangiiffigisassatut siunnersuummik saqqummiussivoq,
tassuuna Inissianik attartortitsisarneq pillugu Inatsisartut peqqussutaannik nr. 2, 12.
maj 2005-imeersumik allannguutissatut siunnersuummik Naalakkersuisut
saqqummiussinissamik pisussaaffilerneqarput. Allannguutissatut siunnersuut
anguniakkanik pingasunik pingaarnertut siunertaqarpoq: 1) attartortut
aningaasaqarnikkut isertitakillinertik patsisigalugu inimut attartukkaminut, imermut
kiassarnermullu aningaasartuutiminnik akiliisinnaanngitsunut akilersuisinnaanerup
periarfissatut atorneqaqqilernissaa akuersaarniarlugu. 2) attartortunut
akileeqqusisarmut piffissarititaq ulluinnarnit pingasunit arfinilinnut
sivitsorneqassaaq. 3) Kiisalu pisortat attartortitsisut annaasanut nalimmassaataasutut
aaqqissuussinermik pilersitsissapput, tamanna ineqarfiit immikkoortorta

sanngiinnerusut ininik attartornermut akiliutinik kingusinaartumik akiliisoqartillugu immikkut ittumik sakkortuumik eqqugaaqqunagit.

1. Siunnersuutip tusarniaassutiginera

A/S Inissiaatileqatigiiffik INI, Iserit A/S, Deloitte, Kalaallit Nunaanni Sulisitsisut Peqatigiiffiat, KANUKOKA, NUSUKA, SIK, ILIK, Sparbank Vest, Grønlandsbanken, Nukissiorfiit, Naalakkersuisut siulittaasuata Naalakkersuisoqarfia, Aningaasaqarnermut Nunanullu Allanut Naalakkersuisoqarfik, Ilaqutariinnermut Peqqissutsimullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Inuussutissarsiornermut, Suliffeqarnermut, Inuussutissarsiutinullu Ilinniartitaanermit Naalakkersuisoqarfik, Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoqarfik, Aatsitassanut Ikummatissanullu Pisortaqarfik, Attaveqarnermut Aqutsisoqarfik aamma Avatangiisinut Aqutsisoqarfik. Avatangiisinut Aqutsisoqarfimmi Pilersuinermit allaffik, Ilaqutariinnermut Peqqissutsimullu Naalakkersuisoqarfik, Iserit A/S, Attaveqarnermut Aqutsisoqarfik, Nukissiorfiit, Aningaasanut Nunanullu Allanut Naalakkersuisoqarfik, A/S Inissiaatileqatigiiffik INI, Inuussutissarsiornermut, Suliffeqarnermut Inuussutissarsiutitigullu Ilinniartitaanermit Naalakkersuisoqarfik aamma SIK tusarniaanermi akissuteqarput. Tusarniaanermi akissutit tunniunneqarsimasut nuutinneri siunnersuummik matuminnga ataatsimiititaliap suliarinninnissaanut atugassatut ataatsimiititaliamit pissarsiarineqarsimapput. Tusarniaanerup ingerlanneqarsimaneranut, tusarniaanermi illuatungerisimasat kikkuneri eqqarsaatigalugit isumatusaarnerullunilu eqqarsaatigilluagaasutut isigineqarmat, ataatsimiititaliaq annertunerusunik oqaaseqaateqarnissamut pissutissaqanngilaq. Siunnersuutip suliarinerani tusarniaanermit akissutit tunniunneqarsimasut ataasiakkaat pillugit Naalakkersuisunut ilisimatitsissutitut naatsunik oqaaseqarnissamut ataatsimiititaliaq pissusissaqalersimavoq.

Attaveqarnermut Aqutsisoqarfik tulluuttunik oqaaseqaateqarpoq:

"Nassuiaatini nalinginnaasuni, immikkoortoq 4-imi ilanngunneqartariaqarpoq: "akiliinissamut piffissaliussap sivitsorneqarnerani Namminersornerullutik Oqartussat kommunillu aningaasaaliissutinit iluanaarutinit pissarsiassaat kingusinnerusukkat akilerneqartalertussaassat. Tamatuma kingunerisaanik Namminersornerullutik Oqartussat taamatullu kommunit aningaasatigut annaasaqartussaapput, aningaasaliissutinit iluanaarutinit erniatigut pissarsiassaraluaminnik annaasaqartussaagamik." Attartortut qassit akilersuinissamik aqqissuussinermit piviusumik ilanngussinnaanerat aammalu tamatumunnga atatillugu aningaasaqarnikkut annaasat annertussuserisinnaasaannut pisortat qanoq ilusilikkamik qanorlu annertutigisumik aningaasartuuteqartariaqarnerat apeqqutaassaaq, matumanilu naalakkersuinikkut tullerriaarnermi nalilersuineq tunngaviusaaq.

SIK tulliuuttunik oqaaseqaateqarpoq:

"SIK-p ukiut kingulliit arlaleriaqaluni avammut nalunaaruteqartarnermini kiisalu Inatsisartunut Naalakkersuisunullu saaffiginnissuteqartarnermini inissianik attartortitsisarnermi peqqarniitsumik periuseqalersimasut - SIK-milu ilaasortatsinnut annermik eqquisartooq - uparuartortuarsimavarput. Takornartaanngilaq ilaasortarpassuatta ilaat suliffeqartut piffissallu ilaa suliffissaaleqinermik eqqorneqarsimasartut imaluunniit napparsimanertik peqqutigalugu piffissap ilaa aningaasarsiorfeeruttartut, taamaalillutillu ineqarnermut, imermut kiassarnermullu aamma akiligassaminnik kinguaattooruteqalersinnaasartut. Taamatut pisoqartillugu aamma ilisimavarput kommunit tamatigit ikiorsiisanngitsut, naak pisortat ikiorsiisarnerat pillugu peqqussutit malillugit taamatut pisussaagaluarlutik. Kommunit ilaat ineqarnermut, imermut kiassarnermullu akiligassanut kinguaattoorutitut akiliussigallartarput taamaaliornerminnili akiitsorineqalersut taarsersugassanngorlugit tunniukkajuttarpaat. SIK-p tamanna suliffeerukkallarnerup nalaani peqqussutigineqartut naapertorlugit ikiorsiinertut nalilersinnaaneq ajorpaa ilaasortatsinnummi amerlanerpaatigit artukkiiginnartarmat.

Taamaattumik inissianik attartortitsisarneq pillugu peqqussut qasukkartiterneqartariaqartoq SIK-mit oqaatigiuartarsimavarput."

Avatangiisinut Aqutsisoqarfimmi Pilersuinermit allaffik tulliuuttunik oqaaseqaateqarpoq:

"Ataatsimut isigalugu:

Pilersuinermit allaffik (FK) naliliivoq peqqussutissatut siunnersuutikkut ineqarnermut akiliutip piffissaq eqqorlugu akilerneqartarnissaanut kajumissuseqarnissaq killilerneqartoq, piffissaq eqqorlugu akiliinngitsoornerup kinguneqartinneqarnissaa siunnersuutikkut annikillisinneqarmat. Tamanna imminut aningaasatigit napatilernissamut atatillugu FK-imit naleqquttuusorineqanngilaq, tassami aningaasartuuteqartarnerup ilusilersorneqarnerata paasiuminartuunissaa pisariaqarpoq, taamaalilluni aningaasaqarnitsinnut nukittorsaasumik akunnaatsumik aalajangiiisoqarsinnaasariaqarluni." Ineqarnermut akiligassap akilernissaanut attartortut kajumissuseqarnerata killiliiffiginissaa siunnersuuteqartup siunnersuummik saqqummiussinermini tunngaviginngikkaa ataatsimiititaliap siunnersuummik suliarinninnermini ilimagaa. Illuatungaatigit ineqarnermut tunngasutigut akiitsorisat amerliartortilernissaannut aarleqquteqarnissap siunnersuutip qanoq annikillisisinnaaneraa aamma eqqarsaatigineqartariaqarpoq.

2. Ataatsimiititaliap isumaliutersuutai nalilersuutaalu

Aallarniutigalugu ataatsimiititaliaq isumaqarpoq, aalajangersakkat oqariartaatsimik "aningaasatigit inissisimanerup allanngornera"-nik ataqatigiisitsisumik

killiliisumillu allataqarsimagunannginnerup nassatarisinnaagaa, attartortut arlaqaqisut pisortani attartortitsisuni akilersuinissamut aaqjissuussinermut ilanngussinnaasutut igisineqalersinnaasut, "aningsaatigut inissisimanerup allanngornera" siumut naatsorsuutigineqarsimanngitsoq tassanngaannarlu pilersoq innersuussutigalugu. Peqqussutissatut siunnersuummi § 1, imm. 6, akilersuinissamut aaqjissuussinermik atuilersinnaanermut tunngasutigut marlunnik killiliisuusunik imaqarpoq:

Akilersuinissamik isumaqatigiissusiorsinnaatitaaneq attartortunut, ukiut pingasut kingulliit ingerlanerini attartugarisimasaminni ineqarnermut aningsaartuutitut ingerlaavartunut akilersugassanulluunniit akiliinngitsoortarnermikkut sumiginnaasimasunut atuutissanngilaq. Taamatuttaaq akilersuinissamik isumaqatigiissusiorsinnaatitaaneq attartortunut akilersukkanik ingerlatsereersunut atuutissanngilaq.

Taamaalilluni inatsisissap oqaasertaleranerani attartortut, inuttut atukkat nammineq pisuussutiginngisat patsisigalugit ajornartoortut aammalu attartortut akisussaassuseqanngitsumik aningsaasaqarnermik ingerlatsinermik nassatarisaanik akiligassaqaalersut akornanni assigiinngisitsisuusumik killiliinermik allaqqasoqanngilaq. Taamaattumik aalajangersagaq ataatsimiititaliamit ima paasineqarsinnaavoq, aallaavittut isigalugu attartortut taakku assigiinngitsut marluisut akilersuinissamik isumaqatigiissusiornissamut pisinnaatitaassasut, aalajangersakkani § 1, imm. 6 naammassineqarsimappat. Aalajangersakkap oqaasertalerneqarnera taanna maanna periusaasumut, februar 2002-miit atuutilersumut sanilliulluni assut sakkortuujusoq ataatsimiititaliamit isigineqartariaqarpoq. Ataatsimiititaliap maluginiarpaa Atassutip aalajangiiffigisassatut siunnersuutiminni tunngavilersuutitut ilaatigut allammassuk:

"Soorunami pissusissamisoorpoq pisortat inissiaataat attartortittakkamik atuinissamut piunasaqaatit ersarilluinnartuunissaat, taamaaliornikkullu akiligassat sumiginnarneqarsinnaanerat pinaveersimatinniarlugu inatsisigut erseqqissumik toqqammaveqarnissaat. ATASSUT-milli isumaqarpugut, attartortut pisussaaffimminnik nalinginnaasumik nakkutiginnilluaraluarlutik aningsaatigut inissisimanerup allanngornerata kingunerisaanik pisussaaffimminnik naammassinninniaruminaatsitsillutik kinguaattooruteqarsimasut periarfissinneqarnissaat eqqumaffigineqartariaqartoq.

Inatsisit ullumikkutut itsillugit, attartortut pineqartut minnerpaamilluunniit periarfissinneqarneq ajorput pisussaaffimminnik naammassinneqqissinnaalernissaminnut. Paasinninnerput naapertorlugu tamanna pisortat tungaannit innuttaasut ajunnginnerpaamik kiffartuunneqarnissaannik anguniakkanut naapertuutinngilaq.

Tassalu siunnersuuteqarnermi attartortut tassanngaannartumik aningsaasaqarnikkut inissisimanerup allanngorneranik eqqorreqartut, taamaalillutillu ineqarnermut, imermut kiassarnermulluunniit qaammammut akiligassaminnik akiliisinnaajunnaartut ikiorneqarnissaat siunertarineqarpoq. Aappaasup imaluunniit

inooqataasup tassanngaannartumik toqukkut qimagunnera imaluunniit tassanngaannartumik suliffissaarunnera assersuutitut taaneqarsinnaapput."

2.1 Naalisaaneq: Peqqussutissatut siunnersuutip paasineqarsinnaanera

Siunnersuuteqartup piumassuseqarlersitsiniaaneranut tunngatillugu peqqussutissatut siunnersuutip maanna oqaasertalerneqarnerata, siunnersuuteqartut tunngavilersuutiminni taaqqaagaannit attartortut amerlanerusut akilersuisinnaalernissaat periarfissippaa.

3. Aningaasaqarnikkut kinguneqaatissat

Allannguutissatut siunnersuut inissiat aningaasaqarniarnerannut aammalu naalakkersuinikkut tulleriaarinikkut sunniuteqassaaq, Naalakkersuisut peqqussutissatut siunnersuummut oqaaseqaatini allappaat:

"Peqqussutissatut siunnersuutip pisortat inissiaataanni attartortittakkani attartortunut, piffissaq eqqorlugu ineqarnermut akiliisartunut aningaasaqarnikkut sunniuteqarnissaa naatsorsuutigineqarpoq, attartortut, akilersuinerminnik sumiginnaasut maannakkut akiliuttartussangussagamikkut."

Naalakkersuisut aammattaq allappaat:

"Peqqussutissatut siunnersuutip atuutilerneratigut akiitsulinnut annaasassanut illuartitassat kvadratmeterimut ukiumut 25 koruuninut qaffanneqartussaassapput. Tamanna Namminersornerullutik Oqartussat illuutaanni attartortittakkani attartortunut 13 mio. koruunit missaannik naleqarpoq. Attartortoq inissiami 85 kvadratmeterinik annertussusilimmi najugaqarpat, qaammammut ineqarnermut akiliummut qaffaatissat 177 koruuniussapput."

"Najugaqatigiiffinni aningaasaqarnikkut pissutsit ingerlaartut unittoorpata aserorpataluunniit aatsaat tamanna pisortanut inissianik piginnittuusunut sunniuteqassaaq, tassalu imaappoq najugaqatigiiffiit naatsorsuuteqarlutik nammineerlutik kaaviiartitsisinnaangippata. Pingaartumik tamanna atuutissaaq akilinningsuukkat pissutigalugit najugaqatigiiffiup akiligassaannik akiliinissamut aningaasassaarussimappat. Taamaattoqarnerani attartortitsisoq aningaasaliisariaqalertussaassaaq."

Pisortat inissiaataanni attartortittakkani attartortunut piffissaq eqqorlugu akiliisartunut peqqussutissatut siunnersuutip aningaasaqarnikkut aamma kinguneqarnissaa piviusorsiortuusooq ataatsimiititaliap maluginiarpaa, tassami attartortut allat inissiaatileqatigiiffik INI A/S-imi akilersuinissamik aaqqissuussinermik angusaqarnissaannut aningaasaqarnikkut periarfissamut attartortut taakku ineqarnermut akiliutip akitsornera aqutugalugu aningaasalersueqataassammata. Tassunga atatillugu SIK-p tusarniaanermut akissutaa Inatsisartunit maluginiaqqussallugu ataatsimiititaliamit tulluartinneqarpoq. Tusarniaanermut akissummi oqaatigineqartutut kommunimit

anigaasalersorneqartumik ikiorneqarnissamut attartortut ullumikkut periarfissaqarput, ilaatigut akilersuinissamik aaqqissuussinikkut imaluunniit allatut ikiorsisiteqarnikkut, innuttaasut inooqatigiinnermi pisimasoq pissutigalugu aningaasaqarnikkut isertitakillisut taamaalillutillu piffissami aalajangersimasumi aningaasaqarnikkut pisussaaffimminnik naammassinnissinnaanngitsut qulakkeerivigineqarnissaannut kommuninit pisariaqartutut isigineqartut.

Ilaatigut takuuk Pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi § 7 aamma § 8, taakkunani inuuniarnikkut pisut suunerat nassuiarneqarluni. Aammattaaq aalajangersakkanik aalajangersimasunik erseqqinnerusunillu qinnuteqartoq naammassinnippat pissutsit innuttaasup ikiorsiissutinik pisartagaqalernissaanut tunngavissat piginnaatitsisut inatsimmi nalunaarneqarput. Aammattaaq ineqarnermut akiliutinut aningaasartuutinut naammaginartunut ikiorsiissuteqarnissamut inatsisartut peqqussutaat periarfissiivoq. Tassunga atatillugu isumaginninnermut inatsit naapertorlugu kommunit pisussaaffimminnik qanoq annertutigisumik naammassinninnerannik naliliinissaq ataatsimiititaliap suliaasaqarfiata isumaliutissiissummilu matumani tunngavigineqartut avataanniippoq, tak. SIK-mit tusarniaanermut akissut. Isumaginninnikkut ajornartorsiutip oqallisigineqarnissaanut Inatsisartut Ilaqutariinnermut Ataatsimiititaliaat oqalliffissatut eqqortutut ataatsimiititaliap isigaa. Inatsisartut peqqussutaat innutaasunik inooqatigiinnermi pisut pissutigalugit aningaasartuutiminnik nalinginnaasunik akiliisinnaanngitsunik ikiuinissamut sammitinneqartoq isumaginninnikkut upalungaarsimasunik kommunini ullumikkut peqarmat ataatsimiititaliap erseqqissaatigiinnassavaa. Taamaalillutik innuttaasut akiligassatigut pisussaaffimminnik naammassinnissinnaanngikkaangata kommunit aningaasartuutinik annaasaqaataasinnaasunillu ullumikkut akiliisarput. Inatsisissatut siunnersuut akuersissutigineqassappat ineqarfinnut immikkoortortaq aningaasaqarnikkut ingerlasinnaajunnaaralarpat akilersuinikkut aaqqissuussinermi allaffissornermut aningaasartuutit aningaasaqarnikkullu annaasaqaratarsinnaaneq Namminersornerullutik Oqartussat inissiatileqatigiiffiata INI A/S-ip tunngaviatigut isumagilissavai.

3.1 Eqikkaaneq: siunnersuutip aningaasaqarnikkut kingunerisinnaasai

Siunnersuut akuersissutigineqassappat inissiani attartortittakkani Namminersornerullutik Oqartussanit pigineqartuni attartortut akiliisinnaassuseqanngitsut inuuniarnikkullu sanngiissuseqartut eqqarsaatigalugit kommunit aningaasalersuinermi nammataqarunnaaratartinneqarsinnaapput. Peqqussutissatut siunnersuut maannamisut isikkoqartillugu INI A/S aqutigalugu nassatarisaanik kingunerissavaa kommunit aningaasartuutaat pisussaaffilu Namminersornerullutik Oqartussanut toqqaannanngitsumik tunniunneqarsinnaanerannut ammaassisoqarpoq. Aammattaaq akilersuinernut aaqqissussanik pilersitsinermut atatillugu sulianik ingerlatsinermut aningaasartuutit amelanerusut INI A/S-ip naatsorsuutigisinnaavai. Kiisalu peqqussutip oqaasertai pissutigalugit innuttaasut aningaasaqarnikkut imminnut tassanngaannartumik isertitakilligallartutut naatsorsuukkamik akilersuinissamik aaqqissuussamut soq ilaaatinneqarsinnaannginnerat pillugu INI A/S-ip nukissanik aamma atuisariaqarnissaa naatsorsuutigineqarsinnaavoq. Akiitsoqarneq pillugu

isumaqatigiissuteqarsinnaalernissamut assersuutigalugu ukiut pingasut ingerlasariaqarneq inuinnaat akuerissagaat ilimanangilaq.

4. Siunnersuut innuttaasut akiitsoqarnerulernerannik kinguneqarsinnaavoq

Innuttaasut amerlanerusut inissiaatileqatigiiffik INI A/S-imi akilersuinissamut aaqquissuussinermut ilaanissaminnik inatsisitigut piumasaqaateqarnissaat peqqussutissatut siunnersuutip maannakkutut isikkoqartilluni kingunerisinnaagaa ataatsimiititaliaq siusinnerusukkut inerniliivoq. Taamaalilluni peqqussutissatut siunnersuutip siunertaanngitsumik tapertatut sunniutaatut innuttaasut pisortanut akiitsui annertuseratarsinnaapput. Ajornartorsiutip tamatuma annertussusissaa nassuiarniarlugu 2009-mi aningaasanut inatsisissatut siunnersuummik ataatsimiittialiap suliaqarneranut atatillugu Aningaasaqarnermut Ataatsimiititaliap Naalakkersuisunut apeqquteqaataa maluginiaqqussallugu tulluartinneqarsimavoq: *"Pisortanut akiligassatigut kinguaattoorutit pillugit takussutissiarineqartup kingulliup tiginissaa Aningaasaqarnermut Ataatsimiititaliamit qinnutigineqassaaq."*

Apeqquut 6.11c

Akissut

Augustip qiteqqunnerani 2008-mi Qitiusumik akiliisitsiniartarfimmiit paasisutissanik tigusineq tunngavigalugu ilisimatitsissutigineqarsinnaavoq akiitsut kinguaattoorutaasut tamarmiusut 694 mio. kr. missaaniittut sulianut 207.893-inut agguataartut. Kinguliani tabelimi akiitsut kinguaattoorutaasut annersaat ilanngunneqarsimapput.

Akiligassat suussusii	Suliat amerlassusii	Qassiuneri
	Stk.	1.000 Kr.
Ikiorsiissutit	54.680	209.760
Akileraarutinit utertoorutit	21.128	146.430
ESU	130	73.734
A-akileraarutit	1.765	48.442
Ineqarnermut akiliut	12.314	46.655
Akileraarutit erniaat	36.636	38.867
Kommuninut akiitsut ass.	8.245	31.106
Akiliisussaaitanunut ikiorsiineq	5.740	21.372

Ilinniarnermi taarsigassarsiat	1.665	13.444
Ullukkut paaqqinniffiit	12.858	11.343
Anartarfilerineq/eqqagassat	36.586	10.819
Kommunini inuussutissarsiutinut taarsigassarsineq	563	7.147
Namminersornerullutik Oqartussanut akiligassat ass.	1.645	6.675
Meeqqamut angerl. Avataanut inis. Angajoqqaat akiliutaat	3.517	5.153
Akiligassat allat	10.421	23.280
Katillugit	207.893	694.227

Siuliani kisitsisit akiligassatut kinguaattoorutitut taaneqartut qitiusumut akiliisitsiniarnermi oqartussaasunut nalunaarutigineqarsimasut taamaallaat ilaapput, taassuma saniatigut ineqarnermut akiligassat BSU-mullu akiligassat kinguaattoorutit, A/S Inissiaatileqatigiiffiup INI'p pinngitsaaliinikkut akiliisitsiniarnini nassiussimanngilai (takuuk 2007-imut landskarsip naatsorsuutai qup. (qall. 153) 122,6 mio. kr.-it BSU-taarsigassarsianit annaasaqaatissanut immikkoortinneqarsimasut.) Siuliani suliat taaneqartut saniatigut danskit nunallu avannarliit oqartussaasuinit pinngitsaaliinikkut akiliisitsiniarnermi suliat 1.895-it nalunaarutigineqarsimapput.

4.1 Akiitsut eqikkarneqarnerat

Innuttaasut pisortanut akiitsui taamaalillutik milliardit affaat sinnerpaat, ineqarnermut akiliutinut tunngasuni akiitsut maannamut nalunaarsorneqartut 50 mio. kr.-inngungajalerlutik. Kisitsit taamaalillutik annertunerusinnaapput. Ineqarnermut tunngasut ataatsimut igalugit akiitsut 170 mio. kr.-it missaanniipput.

5. Ataatsimiititaliap inassuteqaatai

Attartortut ilaasa akilersuisinnaanermut periarfissaqartutut isigineqarsinnaanerat annertunerusumik killiliiffigisinnaaqqullugu peqqussutissatut siunnersuummi oqaasertaliunneqarsimasut, ataatsimiititaliap siunnersuummik misissuataarinera tunngavigalugu, naleqqussarneqarnissaat pisariaqartoq **ataatsimiititaliaq isumaqatigiittoq** isumaqarpoq.

Matumani inuit "inuunermi nalaataqarlutik" piffissap ilaani aningaasaqarnikkut pisussaaffinnik naammassinnissinnaanngitsut taamaallaat INI A/S-imi akilersuinissamik isumaqatigiissuteqarnissamut pinngitsooratik pisinnaatitaanerannit aallaaveqartumik siunnersuutip pingajussaaneeraneqarnissaanut allannguutissatut siunnersuummik Naalakkersuisut saqqummiussinissaat ataatsimiititaliamit

qinnutigineqassaaq. Inunnik isumaginnittoqarfinni atorneqartup oqariartaatsip qanoq paasineqartarnera iluaqutaasumik aallaaviusinnaasoq ataatsimiititaliaq isumaqarpoq. Taamatuttaaq kommunimit oqaaseqaatit pigineqartarnissaat aammalu attartortup pineqartup "inuunermini nalaataqartutut" isigineqarsinnaasup, pisumi qanoq inissisimaneranik uppernarsaateqartarnissap qulakkeerreqartarnissaanut aalajangersakkat oqaasertaliorneqartariaqarput.

Inuit Ataqtigiinnit aallartitat

Peqqussutissatut siunnersuut **akuersissutigineqassasoq** inassutigaa, isumaqarlutilli arlalinnik iluarsisassaartoq, taamaattumillu siunnersuutip matumani pineqartup aappassaaneerreqarnissaanut Naalakkersuisut allannguutissatut siunnersuummik imaattumik saqqummiusseqqullugit Inuit Ataqtigiinnit qinnuigineqarput

- Pisortat attartortitsisuata attartorneq pillugu attartornerup unitsinneqarnera pillugu attartortumut nalunaaruteqarnerani siullermi tamanna kommunimi isumaginninnermut ingerlatsivimmut allakkatigut nalunaarutigisassagaa peqqussutissatut siunnersuummut ilanngunneqartariaqarpoq.
- Kommunini sulianik ingerlatsineq aammalu INI A/S-imik attaveqarneq eqqarsaatigalugit ullormut akiliiffissamut kingullermut killiliussaq ulluinnarnit arfinilinnit ulluinnarnut qulinut sivitsorneqartariaqarpoq.
- Akilersuinissamut qaammatinik sisamanik piffissaliussaq peqqussutissatut siunnersuummit peerneqartariaqarpoq, tamatumunnga taarsiullugu piffissap akilersuiffiusup sivisussusia inuit ataasiakkaat aningaasaqarnikkut akiliisinnaassusiannut naleqqussarneqarnissaanera pillugu tunngavissaq ilanngunniartariaqarluni.
- Akilersuinissamut aqqissuussinerup pilersinneqarneranut 450 kr.-inik akiliuteqarnissamik piumasaqaat peerneqartariaqarpoq, Inuit Ataqtigiit isumaqarput inuit nammakkerneqareersut nammakkeqqikkusunagit akitsuut tamanna inuiaqtigiit ataatsimut pisussaaffigisariaqaraat. Taanna pisussaaffik kiffartuussinissamut isumaqtigiissut aqcutigalugu INI A/S-imit isumagineqassasoq Inuit Ataqtigiit isumaqarput.

Allannguutissatut siunnersuutit taakku pisariaqartut Inatsisartunit taperneqassasut Inuit Ataqtigiit kaammattuutigaat.

Ataatsimiititaliap inassuteqaataa

Siunnersuummik siuliani allanneqarsimasutuut paasinnilluni tassungalu oqaaseqaatigineqarlutik allanneqartut tunngavigalugit siunnersuutip akuersissutigineqarnissaa **ataatsimiititaliap isumaqtigiittup** inassutigaa.

Siulittaasoq